

Celebrando su di dos lustro na Manchebo

Concierto Dominical lo ta inolvidabel diadomingo awo




DIADOMINGO awor, dia 31 di januari 2010, *Concierto Dominical Donny Laclé* ta cumpli 10 añ na Manchebo Beach Resort and Spa den *The French Steak House*. El a bira un evento hopi special pa masha hopi hende, sigur pa esnan cu a mir'e crece y ta presenci'e tur ultimo diadomingo di luna. E concierto aki ta algo special tambe pa es-

nan cu ta organis'e y pa esnan cu a yega di presenta den dje. Concierto Dominical cu a bira un realidad, danki na señor Donny Laclé y señor Ike Cohen, ambos di feliz memoria, ta cumpli su di dos lustro diadomingo awor.

Y manera ta custumber, esaki lo tuma luga den *The French Steakhouse* na Manchebo Beach Resort & Spa den un forma masha festivo. E fundacion organisador a prepara un mainta masha ameno, yena cu bon musica y un ambiente hopi agradabel pa tur esnan cu lo ta presente.

E concierto di diadomingo awor lo ta uno inolvidabel. Tur presente lo disfruta dos ora largo di variacion musical y nivel artistico excelente.

Ramón Riverón, guitarista y cantante fiel y hopi gusta cerca e publico di nos concierto, lo ta presente cu su trio y lo presenta



un seleccion musical cu lo pone e pianan move sin stop.

Un otro presentacion special lo ta di *Grupo Mélange* cu ta bou di direccion di señora Maybelline Arends-Croes, cu den e decada tras di lomba tambe a contribui varios biaha cu hopi amor na nos Concierto Dominical.

Nico Connor, otro fiel contribuyente di nos concierto, a prepara algo hopi special pa conmemora e celebracion di e 10 añanan aki. Cu su steelpan e lo haci e mainta aki uno inolvidabel. E lo tin algun CD di su musica pa bende.

E concierto aki ta cuminsa 11'or di mainta en punto y lo sigui te 13.00 or.

Nos ta invita bo cordialmente pa bin trempa, ya asina bo por scohe un bon luga pa sinta.

Entrada ta completamente gratis, pero ta gradici di awor caba pa e

contribucion financiero cu cada un di boso lo haci na e Fundacion pa Talento Musical Donny Laclé.

Bo ta bon bini diadomingo awor pa 11'or en punto!